



## Extrait de la revue **SingulierS** du 3<sup>ème</sup> trimestre 2010

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

**Rubrique : Éditorial**

### Cand on n' danse nin come la musike va

Lu trimèsse passé, v's-avez bin du ratinde lontins après vosse ruve Singuliers... Lèy k' arivot, dpîs tofèr dins vosse bwèsse ôs lètes, a tins-è a eûre, èle î è cheût avu in mwès du rtârd ! A côze du ki... A côze du cuè ?

La volonté du Bon Diu, pari ? Nèni, mès toutes lès amacrâlriès k' ont put sondjer, s' ènn-ont mèlé. Pou cmincer, l' indjole, l' ordinateûr, si vous vlez, ki tume toudi an rake cand i n' fôt nin. Bin ây doûwô, 'la ç'k'arive, cand on n' hatche nin lès pîrjes du courant èt d' tèlefone duvant d' ènn-aler èt ku l' tounwâre tume dins la contrêye. Ça fwêt du ram' dam' èt dès dègâts ! La co bin ku l' dèr diske n' avot rin, sinon c' èst toute ène ovradge k' èst piêrdûe èt tout l' rèsse dès documints k' on î tint.

Adon, c' èst l' aprètadje dès vacances ki prind dpus tins k' on n' vu, surtout cand on lès prind ène suwmin.ne duvant l's-ôtes èt k' on tûze d' aler vèy in soçon marokin. Min.me si n' dumeûre k' èn-ârtike a achèver, k' in bokèt a adjançner, trop coûrt c' èst trop coûrt ! Fôre su rmète a l' ovradge an rintrant ou cminçmint d' julièt.

Mèlèreûs vous ! C' èst l' moumint dès condjîs payés, l' imprimeû èst clô pou trwâs smwin.nes. On èst ç'côp la bê Djâke avu sa rvûe prêt', rin a fé, on è bê pèstuler, ça n' siève a rin, fôt co ratinde... Jusk' ô dêrin lindi du mwès.

Pîs l' djoûr dul rintrêye dès condjîs arivé, c' èst bin souladjé k' on avoye lu fitchî pa Internèt. On aprind adon, k' i fôre co ratinde ène sumwin.ne, pace ku l' mwêsse ovri ki counu lès pondants èt lès djondants pou l' imprimadje du vosse ruvûe, s' è fwêt opèrer d' ène drompûre d' in diske dul chine ! Ça fwêt ku s'ramplaçante prind kékes djoûrs pou s' mète an route èt s' î rtrouvu dins lès nanches du l' imprim'rie.

Cand l' livreû amon.ne lès trwâs kèsses avu lès 350 ruvûes Singuliers toutes nûves èt ki nodèt co l'intche, on cham'te pou lès mète dins lès-anvlopes... Mès on n' èst nin co ô bout dès rûjes, la k' i manke cinkante anvlopes. Bin ây doûwô, c' èst nin dès anvlopes toutes simpes, èlle ont ène antête avu : tite, pèriodicité, adrèsse èt nimèro d' dossi dul posse, pou z-èsse èvoyer ou tarif dès pèriodikes. C' èst oblidjé d' mète t't-afwêt sinon on paye cate cops pus tchîr. 'La co inla kékes djoûrs du piêrdus pou l' imprimadje dès-anvlopes. C' èst tout ça ki v's-è fwêt ratinde, mès come on dit avôr-ci, lu cé ki ratind n' è nin hôsse !

C' èst l' anêye ki vu ça, ca noste administrateû jènèrâl è co oyu dès rûjes avu l' imprim'rie k' è tiré l' live du l' abé Robert André, « Dol pîre di molin a pîre d' âté ». Dj' ans bin crwâ k' la prèsantâcion tum'rot a l'êwe, ca l' imprim'rie è tumé an fayite èt l' curateû è séré tout l' bâzâr. Eûreûsmint, il l'z-i falot dès côrs pou payer lès frès, èt il ont grèté d' tous lès costés pou-z-e trouvu. Ça fêt k' dj' ans cand min.me oyu lès lives conte paymint sul côp... La cawe du nosse tchèt è bin vnu !

Pierre OTJACQUES